



Ana Patricia Torres Madureira, na súa condición de voceira do Grupo Provincial Popular na Deputación de Ourense, con base ao previsto nos artigos 91 e 97 do ROF, e de acordo á Lei de Base Reguladora do Réxime Local e o Regulamento da Corporación, presenta a seguinte **MOCIÓN RELATIVA O DESMANTELAMENTO DA SEGURIDADE NA PROVINCIA DE OURENSE**, para o seu debate no pleno da corporación, tendo en conta a seguinte

EXPOSICIÓN DE MOTIVOS:

O día 13 de maio de 1844, por Real Decreto de S.M. La Reina Isabel II, fundouse a Garda Civil. Nos seus 180 anos de historia foron innumerables e extraordinarios os servicios prestados á nosa sociedade. Gracias á entrega dos garda civís, mediante Real Decreto de 4 de outubro de 1929, concedéuselle á Garda Civil a Gran Cruz da Beneficencia, consolidando así o título de Benemérita, que dende a súa fundación gañou gracias aos seus numerosos servizos de auxilio e axuda á poboación en toda clase de catástrofes e desgracias.

Dende a súa creación, os seus homes, e dende fai máis de trinta anos as súas mulleres, foron garantes da seguridade pública, protexendo os nosos camiños e estradas, pobos e cidades, permitindo, en resumo, que os cidadáns poidamos exercer os nosos dereitos e liberdades con paz e seguridade. É por iso necesario dar recoñecemento dende as institucións ao gran labor que realizan os Corpos e Forzas de Seguridade do Estado en todo o territorio, esixindo para eles as dotacións e medios que garantan a eficacia do seu labor.

A Garda Civil, os garda civís, son depositarios de valores que quizais nos nosos días poderíamos pensar que están en retroceso e incluso en desuso pero que, con todo, eles cultivan cada día como unha parte fundamental do seu patrimonio: a honra, a súa principal divisa, que preservan como o maior tesouro da súa profesionalidade, porque unha vez que se perde, non se recupera xamais. A lealdade, a disciplina, a entrega e o sacrificio, entregando se fora necesaria, ata a última gota do seu sangue polos demais, como teñen demostrado en miles de



ocasións ó longo da súa historia. Valores que fixeron que a Garda Civil sexa a Institución máis valorada polo conxunto da nosa sociedade e un corpo policial eficaz e de referencia en todas as ordes a nivel internacional.

Os seus homes e mulleres contribúen hoxe en España a garantir a nosa liberdade, a nosa seguridade e o exercicio dos dereitos constitucionais que como cidadáns nos corresponden. A Garda Civil exerce as súas misións e funcións a través de diversas Unidades e especialidades, sendo todas elas necesarias para o eficaz desenvolvemento dos seus cometidos no seu conxunto e en harmonía e colaboración con outros corpos policiais e o resto de Unidades da Garda Civil de España.

O Goberno ten o deber de defender a presenza da Garda Civil, un dos corpos policiais máis preparados e modernos do mundo e que cumpre con honra a misión de protexer o exercicio libre dos dereitos e liberdades e garantir a seguridade nas nosas rúas, estradas, camiños, pobos, de aí a necesidade de apoiar a súa permanencia en todos os pobos e rexións de España, especialmente na España Rural, pois o coñecemento do terreo e da sociedade da que forman parte é o mellor expoñente para garantir a seguridade nestas zonas despoboadas.

A Garda Civil na Comunidade Autónoma de Galicia é responsable da seguridade cidadá de 300 dos 313 municipios da comunidade, un 95,54% do total. Para realizar este cometido conta con máis de 5000 efectivos.

A Zona da Garda Civil de Galicia está formada polas Comandancias de A Coruña, Lugo, Ourense e Pontevedra, cun total de 166 postos, de eles 16 principais, 142 ordinarios e 8 auxiliares, distribuídos en: Comandancia de A Coruña conta con 51 postos, a Comandancia de Lugo con 48, a Comandancia de Ourense con 33 e a Comandancia de Pontevedra con 33.

A Comandancia de Ourense distribúese en 33 postos e conta con 839 efectivos distribuídos en 4 compañías territoriais, e conta coas especialidades de Policía



Xudicial, Información, Seprona, Intervención de Armas, Cinolóxico, Fronteiras e Fiscal, Montaña e Tráfico entre outras. Dos 910 postos de Garda Civil que aparecen no catálogo para a provincia de Ourense soamente se atopan cubertos 839, ó igual que tamén está incompleto o catálogo de efectivos en reserva.

As novas tecnoloxías e unha cultura do traballo máis flexible e menos presencial son, á súa vez, un excelente aliado para que moitos españois teñan a posibilidade de permanecer residindo nas súas cidades ou pobos e incluso, se así o desexan, poidan volver a eles, como puidemos ver dende a pandemia do COVID.

Coa mirada posta neste horizonte, o noso obxectivo ten que ser axudar ao medio rural ourensán a potenciar o seu dinamismo, crear novas oportunidades e difundir as posibilidades que ofrece, garantindo a seguridade necesaria ao igual que nas contornas urbanas.

Xunto ás grandes cidades, temos que traballar para que as oportunidades cheguen tamén a aqueles lugares máis afastados, a eses municipios máis pequenos onde viven e queren seguir vivindo moitos españois, estamos convencidos de que un dos pilares básicos nos que se deben soste as medidas para frear o despoboamento pasa por ter uns niveis de seguridade óptimos que garantan a liberdade dos cidadáns así como o establecemento de infraestruturas e desenvolvemento empresarial.

É necesario poñer de manifesto o valor que aporta a Garda Civil ás zonas rurais da provincia de Ourense, pois dos 304.550 ourensáns tan só o 34% reside na cidade, estando o outro 66% baixo a demarcación da Garda Civil. De aí a necesidade de manter un despregamento territorial adecuado que sexa sensible a todas as demandas e que garanta a igualdade de oportunidades e dereitos en calquera parte do territorio.

As Administracións Locais demandan máis seguridade para os seus pobos, e máxime cando a maioría dos Concellos non contan con Policía Local propia.

Segundo os recentes datos publicados polo Ministerio do Interior o ano 2023 pechouse na provincia de Ourense cun aumento da criminalidade convencional do 7,7%, chamando especialmente a atención o aumento dos delitos contra a liberdade sexual que aumentaron nun 11% e os roubos con forza en domicilios un 18,7%.

Dende o Goberno de España estase a producir un desmantelamento da seguridade nas zonas rurais que afecta especialmente á nosa provincia de Ourense. Segundo resposta do Goberno no pasado mes de novembro, os Cuarteis da provincia de Ourense soamente terán atención ao público presencial dende as 09:00h ás 14:30h *“fuera de ese horario la prestación del servicio se mantén mediante internet, por vía telefónica o por la aplicación AlerCorps”*. Algo totalmente incomprensible nunha provincia cunha poboación maior e con gran dispersión.

Por outra banda, o Goberno a través da Orde Xeral 25/2023 de 28 de decembro, sobre as Compañías e Postos territoriais da Garda Civil, prevé un peche de varios postos auxiliares, algún de maneira inminente coma o do Concello de Baltar, sendo este un Concello fronteirizo con Portugal e que fai inexplicable este peche.

Ademais, vense de aprobar por parte de Goberno de España a supresión da unidade de Fronteiras e Fiscal de Lobios, obrigando ó traslado de 6 familias e deixando sen ese servizo á comarca da Baixa Limia, unha das comarcas ourensás con máis quilómetros de fronteira con Portugal, producindo un agravio máis ó rural ourensán.

En virtude de todo o exposto, o Grupo Provincial Popular propón ao pleno o seguinte

ACORDO

- Insta ó Goberno de España a:



DEPUTACIÓN
DE OURENSE

- 1.- Apoiar e recoñecer o labor que realiza a Garda Civil, comprometéndose a manter a súa presenza en todos os Cuarteis da Garda Civil na provincia de Ourense, dotándoa de máis medios persoais e materiais.
- 2.- Colaborar cos Concellos da provincia de Ourense no mantemento da seguridade cidadá.
- 3.- Proceder á atención presencial dos ourensáns nos Cuarteis da provincia de Ourense as 24h do día.
- 4.- Paralizar urxentemente o traslado da Unidade de Fronteiras e Fiscal de Lobios.
- 5.- Non pechar ningún posto na provincia de Ourense.
- 6.- Reforzar de maneira urxente os Postos da Garda Civil en todas aquelas zonas que carecen de Policía Local.
- 7.- Ocupar as prazas totais que aparecen no catálogo de postos de traballo para a provincia de Ourense e que están libres na actualidade.
- 8.- Elaborar un plan de incentivo profesional e económico para que os axentes queiran ocupar os postos de baixa demanda no medio rural.
- 9.- Empregar urxentemente as vacantes de persoal en reserva sen destino, para dotar de máis axentes á provincia de Ourense.

Ourense, 11 de abril de 2024.

44468060K ANA
PATRICIA
TORRES (R:
V32237471)

Firmado digitalmente
por 44468060K ANA
PATRICIA TORRES (R:
V32237471)
Fecha: 2024.04.11
13:23:13 +02'00'

Asdo. Ana Patricia Torres Madureira.

SR. PRESIDENTE DA DEPUTACIÓN PROVINCIAL DE OURENSE